

սուրբ առաքեալն առնոյր զաշակերտսն եւ փութով հասանէր յաշխարհն Հայոց, առ թագաւորն Սանատրուկ, ի **գաւառին Արտազ, ի քաղաքագեղն Շաւարշան, յապարանս արքունի**, ուր էին **հովոց գետինք** թագաւորացն Հայոց: Եւ քարոզէր անդ զբանն կենաց եւ առնէր նշանագործութիւն[ս] **ի դրան արքունի** [եւ] ի համաշխարհազարդ **բանակսն...**»; «Ես՝ Կիրակոս, էի աշակերտեալ Դաւթի միայնակեցի, բնակէի ի սնարս **լերին Սանատրուկ**՝ ի յայրին, մատ **ի Շաւարշան...** յայտնեցաւ ինձ ի քուն գիշերի յայտնապէս տեսիլ հրաշալի, ի մէջ **Սանատրուկ դաշտի...**»; «...եւ պատմէր /ոմն յԵւտու-նեաց/ սքանչելի տեսիլ... ի տեսլեան գիշերի աղջիկ մի գեղեցիկ տեսլեամբ եւ ասէր՝ Ես եմ Սանդուխտ, արի եւ գնա ի **գաւառն Արտազ, ի քաղաքագեղն Շաւարշան, ի դաշտն Սանատրուկ, ի կայս հանգստեան** մերոյ...»¹: Արդեօք ակնյայտ չէ՞, որ այս բնագրերի համաձայն՝ **արքայական ամառանոց** Շաւարշան քաղաքի (կամ քաղաքագիւղի) **դաշտը**, ուր նահատակուել էին Թադէոս առաքեալն ու իր սան արքայադուստր Սանդուխտը եւ որտեղից նրանց մատունքներն ինչ-որ ժամանակ անց բարձրացրել ու ամփոփել էին գետափից մէկ կմ արեւելք՝ իրօք «առապար» ձորալանջին կառուցուած Ս. Թադէի վանքում, հէնց վերջինից ներքեւ հոսող Ջանգեմար գետի հովիտն էր:

Անշուշտ, այս նոյն **արտագեան** մայրուղով էր շարժուել (այլ ոչ թէ՛ Մարդաստան-Մարդուցայք գաւառով անցնող ուշմիջնադարեան Ղարաէյնի – Բայազէտ մայրուղով) Սասանեան արքայ Խոսրով Ա Անուշիրուանի (531-579) բանակը, ինչի մասին վկայութիւն է պահպանել Սեբիոս պատմիչը («...եկն ինքն արքայն Պարսից, կոչեցեալ Անուշ Ըռուան Խոսրով, հանդերձ **բազմութեամբ սպառազէն զարացն եւ փղաք բազմաք**, եւ ճանապարհ կալեալ **ընդ գաւառն Արտագու՝** գնաց **ընդ Բագրեւանդ**, գանց արարեալ զԿարնոյ քաղաքաւ»)²: Թերեւս՝ նոյն մայրուղով պիտի 484 թ. Դուինից դէպի Հեր գաւառի Նուարսակ գիւղ իջնէր (պարսիկ զօրավար Նիխորի հետ բանակեցելու) Վահան Մամիկոնեանը, ով ճանապարհին իր գնդերով դադար էր առել «ի գաւառն, որ կոչի **Արտազ**, ի գեաւղն, որ անուանեն **Եղինդ**». վերջինը ներկայիս Իրինդն է՝ Մակու քաղաքից 6 կմ հիւսիս-արեւելք³: Վերջապէս, կարծես թէ, այդ հին մայրուղին է ծառայել անգամ ասորեստանցի Սարգոն Բ-ին (Ք. ա. Ը դար), ով իր սեպագրում յիշում է

¹ Անանուն 2004, 6, 19-21: Այս վարքագրական երկի բնագիրն առաջին անգամ հրատարակել է դեռ Հ. Ղ. Ալիշանը (տե՛ս Սոփերք Հայկականք 1853, 9-75, 87-97):

² Սեբէոս 1939, 27 (գլ. 2); Սեբէոս 1979, 68:

³ Փարպեցի 1904, 164 (գլ. Գ.ղա, հմմ. «Մատենագիրք Հայոց», հտ. Բ, 2003, 2357): Նշուած ժամանակագրութեան համար տե՛ս Իւզբաշեան 2005, 118-162 («Պարսկի առն երկիր ո՛չ պագցուք» գլուխը):